

INUIT ATAQATIGIIT

Inatsisartuni



25. september 2017

UKA 2017/15a
Bendt B. Kristiansen

Naalakkersuisut siulittaasuata ammaanermi oqalugiaataa tungavigalugu oqallinneq.

(Naalakkersuisut Siulittaasuat)

Inuiaqatigiit naligiinnerusut, siuariartortullu

Asasakka nunaqqatit, asasakka Inatsisartut, asasakka Naalakkersuisut

Qujanaq Naalakkersuisut Siulittaasuat, ammaallutit oqaaseqaaternut.

Qinigaaffik naajartulerpoq, Inatsisartut sulisimanerisa nalilernerqaqqiffissaat qalleqqilerpoq, piffissarlu kingulleq inerititaqarfissaq annertujunnaarpoq, taamaattoq suliassat annertuut suli utaqqipput.

Piffissaq kingulleq atortigu ataatsimoorneq takutillugu, anguniagaqarneq ataatsimoorussinerlu suleqatigiinnerup aqqanit, inuiaqatigiit pillugit.

Ukiuni aggersuni unammilligassat assigiinngittut annertuujusut ilisimaaraarput, soorlu aamma aningaasaqarnermi siunnersuisooqatigiit tamanna oqariartuutigeqqikkaat, ilinniartitaanikkut, aningaasaqarnikkut, aalisarnernikkut, atungarissaarnikkut, angallannikkut, attartortut atugarisaatigut, sulisartoqarnikkut minnerunngittumillu utoqqartatta meerartattalu isumassorneqarnissaanni.

Ukiarsalernerani aasaq manna Nunatsinni pisut utersaarfiginaqaat. Juunimi Nuugaatsiami tassaarsuaqarnera ajunaarnersuaqarneralu tamatsinnut sunniuteqarsimaqaaq. Inuiaqatigiit kalaallit ajunaarnersuaqartillugu apeqquuserneqarsinnaanngivissumik ataatsimuullaqqissuserput takutipparput. Akunnerit siullernit inuiaat immitsinnut qanillilluta nunaqqativut ajunaarnersuarmik eqqugaasut qanoq ikiorsinnaanerlutigit ujartuilerpugut. Nunaqqatigiit nukittussuserput tamatumuuna takutipparput, qanortoq inuiaqatigiit kalaallit taama issuserput attattuartigut. Tullermut asanninneq pisumi takutitaq nukiuvoq eqqaamajuagassarput.

Nunaqqativut ikinngitsut nunaqarfimminnut, Nuugaatsiamut Illorsuarnullu, suli ulloq mannamut utersinnaanatik allamut nunasigallartariaqarsimapput. Minnerunngitsumik ilaqutariinnguit inuillu ajunaartut eqqarsaatitsinniipput, nunaqqataasut ilaqutaasullu qamanga pisumit misiginneqatigaavut.

Ajunaarnersuaqarnerani Naalakkersuisunit sulingasuarneq erngertumillu inuiaqatigiinnut paasissutissiilluarneq Inuit Ataqatigiit nersualaarusupparput. Upalungaarsimanissamut Ataatsimiititaliaq oqaluttuarisaanitsinni immaqa aatsaat taama annertutigisumik ajunaarnersuarnermut ikiuiartornissamik suliaqarput. Najukkami najuuttut, politiit, annaassiniartut, Issittumi Illersornissaqarfik allallu tamarmik suleqataasimasut qujaffigiumavagut, minnerunngittumik kommunit/ssat suleqataalluarneri pillugit qutsavigivagutaaq.

Ilaqutariippassuit angerlarsimaffeeruteqqapput, nunaqarfiit marluk uterfigineqarsinnangikkallartutut pisortanit nalilernerqarput. Qaqqaq nakkaasinnaasutut nalilernerqartoq peqqutigalugu Naalakkersuisut inuit inuunerannik illersuillutik mianersoqqissaartumik periuseqarnerat Inuit Ataqtigiit paasilluarparput. Taama pisoqartillugu illersugassaq sallek tassaavoq inuup inuunera.

Eqqarsaativut qaammatini ukiunilu arlalinni suli Uummannap sulluaniissapput suliassarlu suli naammassinngilaq. Inuit Ataqtigiinnit Naalakkersuisunut ajunaarnersuarmit eqqugaasunut sullissineq tamakkiisumik taperserparput.

Atugarissaarnek naligiinnerlu

Sooruna naligiinnginneq akioripput? Naligiinnginneq qanoq nalimmatsinniarneqarsinnaava?

Ukiuni makkunani inuiaqtigiinni atugarissaarnek annertuumik ujartorneqarpoq, kinguneranik inuiaqatitta ilarpassui nunamut atugarissaarfiusumut, nunamut akissaateqqortunerpaat inuiaqtigiinni annerusumik akisussaaffilersorneqarfigisimasaanut nutserput. Pissutsit taamaannerisa takutippaa aaqqissuussaansitsinni equngasoqartoq, inuiaqtigiit nammaqtigiinneranni equngasoqartoq, inuiaqtigiit ilarpassuagut oqimaappallaanik ersutassinneqarsimasut, artugarissaarnerpaasortagullu aningaasaqarnikkut annerusumik pisussaaffilersugaanngittut.

Nuna atungarissaarnermik tunngaveqartumik aaqqissuussaasoq assigiissumik akileraarnikkut aaqqissuussineq ajorpoq, tamanna soq taamaappa, assigiissumik akileraariaaseqarnikkut inuiaqtigiinni assigiinngissuseq annertusigaluttuinnartarmat.

Inuit Ataqtigiit ukiami ataatsimiinnissami matumani aaqqissuusseqqinnissat arlallit Naalakkersuisunit saqqummiunneqarnerat iluarisimaarparput. Sulinermi ilanngaattissatut saqqummiunneqartoq peqataaffigisinnaavarput, taamaattoq pisuut akileraarnerulernissaannik taasamik atuutsitsilernikkut akileraartarnermi aaqqissuussisoqassasoq piumasaralutigu. Sulinerup kajuminnarnerulersinneqarnissaa imminullu akilersinnaanerulersinneqarnissaa anguniartariaqarpoq, ilisimaarivarpummi sulisinnaalluaraluartut akileraartarnermi aaqqissuussaanerup iluani imminnut killilersorlutik sulumanngilertarnerat annertuutut oqaatigineqartartoq, ilaatigut sulinermut ilanngaasiinikkut ingalassimaarniartinneqarniarsinnaasoq.

Nunatta aningaasaqarnera aaqqissuuteqqinneqanngippat ukiuni aggersuni isertittarumaagassat aningaasartuutigiumaagassallu oqimaaqtigiisinniarnanni annertuumik ajornartorsiuteqalersussaavoq, aningaasartuutaasarumaartut isertittarumaagassanit amerlanerulluinnalerataannaammata.

Nutaanik isertitassaqarumalluni ilaatigut aningaasaleeqqaarnissaq pisariaqartarpoq, taamaattoq aningaasaliinerit ima annertutigilissangillat inuiaqtigiit namaassinnaanngisaannik kinguneqaratarsinnaallutik, taama ippoq mittarfiliortiternissami pilersaarutini. Kalaallit Airport A/S-imut aningaasalersuinissamik Naalakkersuisut siunnersuuteqarnerat mianersortumik, inuiaqtigiinnullu kingunerluutigisinnaasaanik nalilersorluangaasumik ingerlariaqqissasoq Inuit Ataqtigiit isumaqarpugut. Apeqqutit suli qulaajarneqanngittut nalilersorluagassallu ilagaat mittarfiit imminnut akilersinnaanngittutut taaneqartartut sullissinikkullu isumaqtigiissuteqarfiusut qanoq ilusilimmik siunissami ingerlanniarneqarnerisut, taakkunanilu najungaartut akitigut pilliutigineqannginnissat.

Kommunit nunaqarfiillu

Pisortat susassaqrifiini aqqissuusseqqinnerit suli ingerlapput, siunertarlu innuttaasut pisortanit sullinneqarnerminni qaninnersumik sullinneqarnissaat puigornagu sulissuugut, Namminersorlutik Qqartussanit kommuninut nussuinerinnaanngittumi aammalu allaffissornikkut aqqissuussaannitta innuttaasunut qaninnerusumik iluseqarnissaa eqqarsaatigalugu, maluginiarparpullu tamanna Kommuni Qeqertalik-ssamit siunertarineqartoq.

Ukiuni kingullerni nunaqarfiit annerujartuinnartumik akisussaaqataarusunnermik oqariartuuteqartarnerat tusaavarput, tamannalu pissusissamisoortuuvoq akisussaaqataarusunnermik tunngaveqarluni. Imminut namminerlu susassaqrifiup iluani pisinnaatitaaffinnik nunaqarfinni aqutsisut annertusaavigineqarnissaat pissusissamisoorpoq.

Qaasuitsup Kommuniata ukioq 2018-ip aallartinnerani kommuninut marlunnut avinneqarluni ingerlalerumaarnerani kommunit nutaassat, Kommuni Qeqertalik aammalu Avannaata Kommunua qamanna pisumik ingerlalluarnissaannik kissaappagut.

Ineqarnermi aqqissuusseqqinnermi inissiat pisortanit pigineqartut kommuninut nuunniarneqarnerat pissusissamisoorpoq, kommunimmi taakkuupput pisariaqartitsinnermut qanimut ilisimannittuusut.

Sulerusussuseq - akisussaaqataaneq

Sulerusussuseq inuit ataasiakkaarluta pigisarput tassaavoq inuiaqatigiit nukiat, tassaavoq inuiaqatigiinni aningaasanik kaavisitsisoq, tassaavoq inuiaqatigiit piumassusaat, sukarsuit 56 tusind-it. Sulinerup meeraanermilli kajuminnartut nalilernerqarsinnaaqqullugu angerlarsimaffiit ataasiakkaat annertuumik pisussaaffeqarput.

Sulinerup imminut akilersinnaasariaqarnera kialuunniit apeqqusernagu kissaatigaa. Sulineq imminut akilersinnaanngittut nalilernerqartillugu pisortanit ikiorsiissutit aqutugalugit inuuneq oqinnerusutut toqqarniarneqalersartoq paasisarparput, tamassuma takutippaa aqqissuussaannikkut ataqatigiinngittoqartoq. Pingaartumik ilaqutariit meerartallit sulisartullu inuiaqatigiinni isertitakinnerit akunnattumillu isertitaqqortuut inuuniarnikkut oqinnerusumik aqutissiuunneqartariaqartut Inuit Ataqaatigiit isumaqarpugut.

Inuiaqatigiinni akisussaaqatigiinnerup meeqqat atuarfianni ilikkagassat pingaarnerpaannut ilaasariaqartoq isumaqarpugut, isumaqarpugut tamanna anguneqarsinnaasoq inuiaqatigiinni nutaamik eqqarsariaatsimik ingerlatsinikkut, inuiaqatigiinni sulinikkut akisussaaqataanusunnermik tunngaveqartumik.

Eqqarsariaqqilaariarta, ullumikkut Royal Greenland suliffissuaqarfimminni sulisussaminnik inuit 38 Kina-mit tikisinnikuuaat! Aalisakkanik avammut niunerneq nunatta aningaasaqarnikkut tunngaviata pingaarnersaa sulisartoqarnikkut namminerluunniit inuttaqartissinnaajunnaarsimagutsigu sumut killissimassuugut?

Anguniagaasariaqarpoq meeqqat atuarfiat qimalersillugu maannakkornit amerlanerulluinnartut piareersimassassasut inuunermi suniarnerlutik, alarpernaassutsimik sulerusussutsimillu peqarlutik. Taamatut eqqarsarneq tassaavoq akisussaaqataarusunneq, inuiaqatigiinnik kivitseqataarusunneq.

Isumaginninnermi sullissineq

Isumaginninnikkut suli annertunerusumik suliaqarnissaaq pingaartillutigu Naalackersuisooqatigiinni suleqataavugut. Naligiinnginnerup akiornerani nunaqqativut atugarliortut meeqqallu sumiginnagaasut iliuseqarfigninerini siusissukut iliuseqarneq, pinaveersaartitsineq minnerunngitsumillu suliaqarfiit akimorlugit suliaqarneq qitiutipparput. Naalackersuinikkut isumaginninnikkut kommuninik suleqatiginninneq annertoq

ingerlanneqarmat iluarisimaarparput isumaginninnikkullu suli sukataarnissaq kaammattuutigalutigu.

Ilisimaarivarput isumassuinermi sullissineq kommuninit ingerlanneqarmat, bloktilskud-ikkut aningaasalerneqartarluni. Ilisimaarilluinnarparpullu inuiaqatigiinni isumassuinermi ikiorserneqartariaqartut sullinneqarneranni annertuumik suliassaqaratta, tamanna meeqqat illersuisuata ukiuni kingullerni annertuumik qulaajarmagu piffissaq iluatsillugu qutsavigissuarput, ajornartorsiutimmi ataasiakkaatut kivissallugit oqimaattorsiutigut annertuumik qulaajarneqarput, ilaatigut meeqqat pisinnaatitaaffii eqqarsaatigalugit pittaanerumik sullissisariaqarnitsinnik eqqaasitsuusut.

Immitsinnut aperisa, qanoq ilillutaana isumassuineq pittaanerusoq anguniaripput, kikkulluuku sullissisoriniarigut?

Maannakkut periutsit atukkavut naammakkunnaarsimmata nassuerutigisarsiaqarparput. Isumaginninnermi siunnersortitut ilinniarsimasut naammattumik piginnigilugut, pædagog-it ilinniarsimasut naammattut piginnigilugut, isumaginninnermi ikiortit naammattumik piginnigilugut, taava naggataani kiaana suliassaq kivinniaaraat, sulilu uagutaaq utoqqalisussaalluta.

Imigassamut inatsit

Inuiaqatigiit imigassaq pillugu annerusumik oqallinnissaat pisariaqarluinnartoq malungaarput Naalackersuisut imigassamut inatsisissamik saqqummiussinerata kingorna inuiaqatigiit akornanni oqallinnikkut.

Naalackersuisut imigassamut tunngatillugu inatsisinik iluarsaaqqinnikkut Nunarsuarmi Peqqinnissamut Suliniaqatigiiffiup, WHO-p, sulissuteqarfigineqartussatut taallugit kaammattuutigisai arlallit malinniarmatigit iluarisimaarparput. Siunnersuut Nunarsuarmi Peqqinnissamut Suliniaqatigiiffiup WHO-p imigassamut tunngatillugu sunniuteqarluartumik pitsaaliuinissaq - pingaartumik imigassap takussaanerata, pissarsiarineqariaannaanerata nittarsaanneqarneratalu killilersornissaa - pillugu kaammattuutaanik tunngaveqartut ilualungu maluginiarparput.

Ukiuni arlaqalersuni Inuit Ataqtatigiit pingaernerpaatittarsimavarput meeqqat atugaasa pitsanngorsarneqarnissaat. Meeqqat toqqissisimasumik peroriartornissaat aqutissiuukkumajuarparput. Imigassamut politikkiliornermi meeqqat toqqissisimanissaat pingaernerpaatinneqarmat iluarivarput.

Aalisarnermut suliaq peqqissaarunneqassaaq

Ukiaq manna aalisarneq kingumut oqallisigineqarnerpaanut ilaavoq. Inuit Ataqtatigiit iluarisimaarparput kiisami tigussaasumik aalisarnermut inatsisip qanorpiaq nutarterneqarnissaa pillugu oqallittoqarmat. Anguniagaraarput pisasseeriaatsini atorneqartuni inuiaqatigiit pisuussutinik piginnittuunitta erseqqivissumik naqissuserneqarnissaa. Aamma anguniagaraarput aalisartunut ataasiakkaanut inuiaqatigiinnullu tamarmut aalisartuunerup aalisakkanillu atuinitta napatittuarsinnaanissaa. Piujuuaannartitsineq siammasissoq tunngaviuusaaq, piujuuaannartitsineq avatangiisinut, peqassutsimut, aningaasarsiornermut, kultuuritsinnullu minnerunngittumillu kinguaatsinnut taakkualu kinguaassaannut tunngavilik.

Inuit Ataqtatigiit aalisarnermut inatsisip nutarternerani mianerisassatut tikkuarusutavut arlaqarput. Siullertut suleriaaseq, politikikkut suliassaq pitsaasumik sularineqarsimassaaq politikerit akornatsinni taamaallaat oqallinnata inuiaqatigiinnili susassaqartut qanimut

suleqatigalutigit. Aaqqissuuseqqinnerit taama annertutigisut peqataatsilluarluta suliassaraavut. Inuiaqatigiit nappatigisaannut inuussutissarsiummut tamanna suli annermik pingaaruteqarpoq. Inuit Ataqtigiit kaammattuutigiumavarput politikereit susassaqtullu akornanni oqaloqatigiinnerit maanna aallartilluartutut oqaatigineqarsinnaasut nangillugit inuiaqatigiit naapissutigisinnaasaannik naammassasisaqarnissaq ujartorneqassasoq sulissutigineqassasorlu. Tamatta immikkut akerleriissutissatsinnik ujartuinata ataatsimoorfissavut ujartigit.

Politikkikkut suliaqartuusugut tamatumani tusarnaarsinnaanerput qitiuvoq. Tamatuma saniatigit annertuumik suliaqartilluta peqqissaarnissaq kukkunaveersaaqqissaarnissarlu aamma pisariaqarluinnarpoq. Inatsisissatut siunnersuutip saqqummiunneqartup kingunissai ilanngullugit qulaajarsimanissaat anguniarneqartariaqarpoq.

Qeqertarsuup tunuani qaleralinniarneq ukiunut siuliinut naleqqiullugu kinguariartortoq tamatta malugaarput, taamaattumik Naalakkersuisut siulittaasuata aalisartitsivimmi tassani aalisarneq ataatsimut isigalugu nutaamik aqutseriaaseqarnissamik isumaliuteqarnissaq oqariatuutigimmagu pissusissamisoortipparput.

Attaveqaatit - Attavilersuutit

Iluarisimaarparput TelePost-ip internet-ikkut attaveqaatinik nunarput siammasissumik piorsarmangu, tamanna TelePost-ip maanna aaqqissuussaanerata ilusaata pisinnaatippaa. Taamaattoq innuttaasut 8%-ii Qaanaaq-mi, Ittoqqortoormiit-ni aamma Tasiilaq-mi pilersaarummut ilaangillat.

Anguniagassaq tulliusariaqarpoq nunatta isorliunerusortai satellit atorlugu attaveqartuartariaqartut satellit-ikkut attaveqaasersorneri qallunaat naalagaaffiat aaqqiissutissioqatigineratigit piorsaaqinnissaat.

Aatsitassarsioneq

Aatsitassarsioneq tassaavoq nunatsinni inuussutissarsiornikkut aningaasarsiornikkullu siammasinnerusumik ineriartornissamat toqqammavileeqataasusaaq.

Ukioq manna maluginiarparput aatsitassarsiornikkut nunarput ilorraap tungaanut aallartoq. Aatsitassarsiorfik ataaseq ammarneqarpoq allalu ataaseq sanaartorneqaleruttortoq aasamat tunisassiulertussaalluni. Taakku saniatigit aatsitassarsiorsinnaanermut misissuinerit siornamat sanilliullugu pingasoriaatingajammik qaffariartut tusagassiutitigit ukiassalernerani saqqummerpoq. Taakkuinnaangillalli – nunaqavissummi aatsitassanik misissueqqaarnissamat qalluinissamullu akuersissutaatillit amerliartupiloorput, ukioq mannaluu aatsaat taamak amerlatigilerlutik. Eqqaariikkatta saniatigit aatsitassarsiorfiulerumaartussatut pilersaarutigineqartut qanimut pissangalluta malinnaaffigaagut.

Ineriartornerup pitsaasumik aallarneranut neriutissaqarluarpugut pitsanngorsagassaqartuarnerpulli puigussanngilarput. Eqqumaariffigisassagummi amerlapput, assersuutigalugu aatsitassarsiornissamat sinaakkusiarisimasatta pitsanngorsartuarnissaanik sulinissarput pisariaqarpoq nunarsuarmi unammillertigisatsinnut unammillersinnaajuassagutta. Minnerunngitsumilli aatsitassarsiornerup avatangiisinut sunniutigisinnaasai eqqumaariffiguarlugit piareersimavissaraagut nalilersortuagassaralugillu.

Illersornissaq

Ukiut makku nunarsuarmi pissaanilissuit sakkortuumik pissaaneqarniupput, ilaatigit issittoq pillugu, ilaatigit naalagaaffiit qaartartorsuarnik sakkussiarsuit atorlugit nukitit

nittarsaateqattaarpat, ilaatigut nillertumik sorsunnerup aappaa aallartittutut oqaatiginiarneqartalerluni.

Nunarsuarmi pissutsit najummassimaarnarsiartorneranni avaqqunneqarsinnaanngilaq illersornissamut nunanullu allanut tunngasuni Folketing-imit nunanut allanut isumaqatigiinniartoqartillugu nunatta tamatigut avaqqunneqanngilluinnartarnissaa, soorlu aamma Igaliku-mi isumaqatigiissut taamak imaqartoq.

Suliniartariaqarpugut qallunaat illersornissaqarfiat aqutigalugu nunatsinnut tunngasuni sunniuteqarneruniarluta, assersuutigalugu issittumi satellit-ikkut attaveqaatit ullutsinnut naapertuunnerusut, ilaatigut Qaanaaq-mut, Ittoqqortoormiut-nut Tasiilaq-mut iluaqutaasinnaaqullugu,

Aalajangiusimassuarput Folketing-imit issittoq pillugu suliniutit annertusarniarneqarnerat piviusunngortinneqassasoq, naak illersornissamut aningaasaliissutit nalunaarusiarineqarneranni nunatsinnut tunngasuni Arktisk Kommando maannakkornit annikinnerusumik aningaasaliivigineqassasoq siunnersuutigineqaraluartoq.

Ullumikkut kalaallit ikittuinnaat illersornissaqarfimmi atorfeqarnerat eqqarsaatiginartarpoq, eqqarsaatissiisariaqarlunilu. Kalaallit peqataatinneqarnerulernissaat inuinaat amerlanerit akuutinneqalernerisigut illersornissaqarfimmi amerlanerit ilinniagaqalersinnerisigut pisinnaavoq. Ullumikkummi Kalaallit Nunaanni suliasanut danskit ilersornissaqarfia isumaginittuusarpoq, soorlu aalisarnermik nakkutilliinermi, ilisimatusarnermi ilisimasassariottut ikiornerini, ujaasinerni annaassiniarnernilu, ilaatigut uuttortaanerni, avatangiisinik nakkutilliinerni mingutstsinaveersaarnernilu. Akisussaaffiit taakkartorneqartut ilarpassui nammineq ingerlassinnaalluaraluartoq.

Siunissaq - namminiilivinnissarlu

Inuit Ataqtigiiit pilersinneqarnerminni siunertaata pingaarnersaasa ilagaat Kalaallit Nunaata aningaasaqarnikkut aamma nunat tamat akornanni inuiaat inatsisaat naapertorlugit namminersulivinnissaa, maanna partiit tamarmik anguniakkatut siunniussimaligaat, soorunami iluarisimaakkatsinnik, ilaatigullu aammalu nunatta pisuussutaasa inuiaqtigiiinnut tamanut iluaqutaanissaat.

Namminiilivinnissamut oqallinneq sulinerlu ingerlaruttulerput, namminerisamik inatsiseqalernissaq siunertaralugu sulineq iluarisimaakkatsinnik aallartisaruttulerluni, inuiaqtigiiillu oqalliseqataaalluarnissaannik kaammattorpugut, namminersulivinnissamummi aalajangernissaq inuiaat kalaallit namminneq kisimiillutillu aalajangingassariumaarpat piffissaq takkupat, taamanikkussamullu kisigani inuiaqtigiiittut piareersimanissaq pingaaruteqaqaaq.

Inuiaat namminiilivittussat akisussaaffinnik annertunerusunik aamma tigusissapput. Tassa ornitarput. Inuit Ataqtigiiillu qilanaarisarput. Avammut nunanut allanut tamanna atuuppoq, ilummullu inuiaat akornatsinni nunaqqatitsinnut pisussuserisatsinnut tamanna atuuppoq.

Kalaallit nunatsinni amerlanerussuteqangaarpugut. Uaguuvoq siunissatsinnik aalajangersaasut aalajangersaasussatuaasullu, tamanna inuiaqtigiiit kalaallit ukioq 2009-mi taasinerikkut ilusilerpaat.

Namminiilivinnissaq angutserlugu suliaqarnitsinni minnerunngitsumillu tunngaviusumik inatsisiliornerup aallunnerani akisussaaffiit taakkua qiviagassaraavut. Inuiaat inissaqartitsisut, kalaaliussutsitsinnik tunngaveqarluartut, kinaassutsitsinnik tulluusimaarinnittut uatsinniillu "allaanerusunik" qunugisaqanngitsut.

Kalaallimmi inuiaat assigiinngisitaarpugut. Assigiinngisitaarneq taanna nukittut atussavarput, aamma namminiilivinnissamut suliaqarnitsinni.

Inuianni amerlanerussusillit ikinnerussuteqartunik qanoq pinninnerput inuiattut qanoq issusitsinnik takutisisuuvoq. Tamatumani Inuit Ataqtigiit akaareqtigiinneq, nanertuutinnginneq, peqataatitsinerlu tunngavigiumavagut. Taakkuuppummi ilisarnaatit inuiattut nukittussusermik takutisisut.

Qilanaarpugut inuiaqtigiinni siammasissumik peqataatitsinikkut suliassat aallunnissaannut.

Siunissaq neriulluarnartoq qaamasorlu ornipparput, siunissaq kinguaassatsinnut kingornussassiassarput.

Oqallilluarisi